



金剛三昧經

出北涼錄失譯師名



清刻龍藏佛說法變相圖

金剛三昧經卷上

難九

出北涼錄失譯師名

序品第一

如是我聞一時佛在王舍大城耆闍崛山中  
 與大比丘衆一萬人俱皆得阿羅漢道其名  
 曰舍利弗大目犍連須菩提如是衆等阿羅  
 漢復有菩薩摩訶薩二千人俱其名曰解脫  
 菩薩心王菩薩無住菩薩如是等菩薩復有  
 長者八萬人俱其名曰梵行長者大梵長者  
 樹提長者如是等長者復有天龍夜叉乾闥  
 婆阿脩羅迦樓羅緊那羅摩睺羅伽人非人  
 等六十萬億爾時世尊四衆圍繞爲諸大衆  
 說大乘經名一味真實無相無生決定實際  
 本覺利行若聞是經乃至受持一四句偈是  
 人則爲入佛智地能以方便教化衆生爲一

切衆生作大知識佛說此經已結跏趺坐即入金剛三昧身心不動

爾時衆中有一比丘名曰阿伽陀從座而起合掌胡跪欲宣此義而說偈言

大慈滿足尊 智慧通無礙 廣度衆生故

說於一諦義 皆以一味道 終不以小乘

所說義味處 皆悉離不實 入諸佛智地

決定真實際 聞者皆出世 無有不解脫

無量諸菩薩 皆悉度衆生 爲衆廣深問

知法寂滅相 入於決定處 如來智方便

當爲入實說 隨順皆一乘 無有諸雜味

猶如一雨潤 衆草皆悉榮 隨其性各異

一味之法潤 普充於一切 如彼一雨潤

皆長菩提芽 入於金剛昧 證法真實定

決定斷疑悔 一法之印成

無相法品第二

爾時世尊從三昧起而說是言諸佛智地入實法相決定性故方便神通皆無相利一覺了義難解難入非諸二乘之所知見唯佛菩薩乃能知之可度衆生皆說一味

爾時解脫菩薩難九即從座起合掌胡跪而白佛

言尊者若佛滅後正法去世像法住世於末

劫中五濁衆生多諸惡業輪迴三界無有出

時願佛慈悲爲後衆生宣說一味決定真實

令彼衆生等同解脫佛言善男子汝能問我

出世之因欲化衆生令彼衆生獲得出世之

果是一大事不可思議以大慈故以大悲故

我若不說即墮慳貪汝等一心諦聽爲汝宣

說善男子若化衆生無生於化不生無化其

化大焉令彼衆生皆離心我一切心我本來

空寂若得空心心不幻化無幻無化即得無  
生無生之心在於無化

解脫菩薩而白佛言尊者衆生之心性本空  
寂空寂之心體無色相云何修習得本空心  
願佛慈悲爲我宣說佛言菩薩一切心相本  
來無本本無本處空寂無生若心無生即入  
空寂空寂心地即得心空善男子無相之心  
無心無我一切法相亦復如是

解脫菩薩而白佛言尊者一切衆生若有我  
者若有心者以何法覺令彼衆生出離斯縛

難九

三

佛言善男子若有我者令觀十二因緣十二  
因緣本從因果因果所起興於心行心尚不  
有何況有身若有我者令滅有見若無我者  
令滅無見若心生者令滅生性若心滅者令  
滅滅性滅是見性即入實際何以故本生不

滅本滅不生不滅不生不生不滅一切法相  
亦復如是

解脫菩薩而白佛言尊者若有衆生見法生  
時令滅何見見法滅時令滅何見佛言菩薩  
若有衆生見法生時令滅無見見法滅時令  
滅有見若滅是見得法真源無入決定性決  
定無生

解脫菩薩而白佛言尊者令彼衆生住於無  
生是無生也佛言住於無生即是有生何以  
故無住無生乃是無生菩薩若生無生以生  
滅生生滅俱滅本生不生心常空寂空寂無  
住心無有住乃是無生

解脫菩薩而白佛言尊者心無有住有何修  
學爲有學耶爲無學耶佛言菩薩無生之心  
心無出入本如來藏性寂不動亦非有學亦

非無學無有學不學是即無學非無有學是為所學

解脫菩薩而白佛言尊者云何如來藏性寂不動佛言如來藏者生滅慮知相隱理不顯是如來藏性寂不動

解脫菩薩而白佛言尊者云何生滅慮知相佛言菩薩理無可不若有可不即生諸念千思萬慮是生滅相菩薩觀本性相理自滿足千思萬慮不益道理徒為動亂失本心王若無思慮則無生滅如實不起諸識安寂流注不生得五法淨是謂大乘菩薩入五法淨心難九即無妄若無有妄即入如來自覺聖智之地入智地者善知一切從本不生知本不生即無妄想

解脫菩薩而白佛言尊者無妄想者應無止

息佛言菩薩妄本不生無妄可息知心無心無心可止無分無別現識不生無生可止是則無止亦非無止何以故止無止故

解脫菩薩而白佛言尊者若止無止止即是生何謂無生佛言菩薩當止是生止已無止亦不住於無止亦不住於無住云何是生解脫菩薩而白佛言尊者無生之心有何取捨住何法相佛言無生之心不取不捨住於不心住於不法

解脫菩薩而白佛言尊者云何住於不心住於不法佛言不生於心是住不心不生於法是住不法善男子不生心法即無依止不住諸行心常空寂無有異想譬彼虛空無有動住無起無作無彼無此得空心眼得法空心五陰六入悉皆空寂善男子修空法者不依

難九

五

三界不住戒相清淨無念無攝無放性等金剛不壞三寶空心不動具六波羅蜜

解脫菩薩而白佛言尊者六波羅蜜者皆是有相有相之法能出世耶佛言善男子我所說六波羅蜜者無相無為何以故善入離欲

心常清淨實語方便本利利人是檀波羅蜜至念堅固心常無住清淨無染不著三界是尸波羅蜜修空斷結不依諸有寂靜三業不

住身心是羸提波羅蜜遠離名數斷空有見深入陰空是毗梨耶波羅蜜具離空寂不住諸空心處無住不住大空是禪波羅蜜心無

心相不取虛空諸行不生不證寂滅心無出入性常平等諸法實際皆決定性不依諸地不住智慧是般若波羅蜜善男子是六波羅

蜜者皆獲本利入決定性超然出世無礙解

脫善男子如是解脫法相皆無相行亦無解不解是名解脫何以故解脫之相無相無行無動無亂寂靜涅槃亦不取涅槃相解脫菩薩聞是語已心大欣懌得未曾有欲宣義意而說偈言

大覺滿足尊 為衆敷演法 皆說於一乘

無有二乘道 一味無相利 猶如太虛空

無有不容受 隨其性各異 皆得於本處

如彼離心我 一法之所成 諸有同異行

悉獲於本利 滅絕二相見 寂靜之涅槃

亦不住取證 入於決定處 無相無有行

空心寂滅地 寂滅心無生 同彼金剛性

不壞於三寶 具六波羅蜜 度諸一切生

超然出三界 皆不以小乘 一味之法印

一乘之所成

難九

六

爾時大衆聞說是義心大欣懌得離心我入  
空無相恢廓曠蕩皆得決定斷結盡漏  
無生行品第三

爾時心王菩薩聞佛說法出三界外不可思  
議從座而起叉手合掌以偈問曰

如來所說義 出世無有相 可有一切生

皆得盡有漏 斷結空心我 是則無有生

云何無有生 而得無生忍

爾時佛告心王菩薩言善男子無生法忍法  
本無生諸行無生非無生行得無生忍即爲

虛妄

心王菩薩言尊者得無生忍即爲虛妄無得  
無忍應非虛妄佛言不也何以故無得無忍  
是則有得有得有忍是則有生有生於得有  
所得法並爲虛妄

心王菩薩言尊者云何無忍無生心而非虛  
妄佛言無忍無生心者心無形段猶如火性  
雖處木中其在無所決定性故但名但字性  
不可得欲詮其理假說爲名名不可得心相  
亦爾不見處所知心如<sup>難九</sup>是則無生心善男子  
是心性相又如阿摩勒果本不自生不從他  
生不共生不因生不無生何以故緣代謝故  
緣起非生緣謝非滅隱顯無相根理寂滅在  
無有處不見處所住決定性故是決定性亦  
不一不異不斷不常不入不出生不滅離  
諸四謗言語道斷無生心性亦復如是云何  
說生不生有忍無忍若有說心有得有住及  
以見者即爲不得阿耨多羅三藐三菩提是  
爲長夜了別心性者知心性如是性亦如是  
是無生行

心王菩薩言尊者心若本如無生於行諸行無生生行不生不生無行即無生行也佛言善男子汝以無生而證無生行也心王菩薩言不也何以故如無生行性相空寂無見無聞無得無失無言無說無知無相無取無捨云何取證若取證者即為諍論無諍無論乃無生行佛言汝得阿耨多羅三藐三菩提也心王菩薩言尊者我無得阿耨多羅三藐三菩提何以故菩提性中無得無失無覺無知無分別相無分別中即清淨性性無間雜無有言說非有非無非知非不知諸可法行亦復如是何以故一切法行不見處所決定性故本無有得不得云何得阿耨多羅三藐三菩提佛言如是如是如汝所言一切心行不過無相體寂無生所有諸識亦復如是何以

故眼眼觸悉皆空寂識亦空寂無有動不動相內無三受三受寂滅耳鼻舌身心意意識及以末那阿梨耶亦復如是皆亦不生寂滅心及無生心若生寂滅心若生無生心是有生行非無生行內生三受三行三戒若寂滅生心則不生心常寂滅無功無用不證寂滅相亦不住於無證可處無住總持無相即無三受三受等三悉皆寂滅清淨無住不入三昧不住坐禪無生無行

心王菩薩言禪能攝動定諸幻亂云何不禪佛言菩薩禪即是動不動不禪是無生禪禪性無生離生禪相禪性無住離住禪動若知禪性無有動靜即得無生無生般若亦不依住心亦不動以是智故故得無生般若波羅蜜

心王菩薩言尊者無生般若於一切處無住於一切處無離心無住處無處住心無住無心心無生住如此住心即無生住尊者心無生行不可思議不思議中不可說佛言如是如是心王菩薩聞如是言歎未曾有而說偈言

滿足大智尊 廣說無生法 聞所未曾聞  
未說而今說 猶如淨甘露 時時乃一出  
難遇難思議 聞者亦復難 無上良福田  
最上勝妙藥 為度衆生故 而今為宣說  
爾時衆中聞說此已皆得無生難九無生般若  
本覺利品第四

爾時無住菩薩聞佛所說一味真實不可思議從遠近來親如來坐專念諦聽入清白處身心不動爾時佛告無住菩薩言汝從何來

今至何所無住菩薩言尊者我從無本來今至無本所佛言汝本不從來今亦不至所汝得本利不可思議是大菩薩摩訶薩即放大光遍照大千界而說偈言

大哉菩薩 智慧滿足 常以本利 利益衆生  
於四威儀 常住本利 導諸羣庶 不來不去  
爾時無住菩薩而白佛言尊者以何利轉而轉衆生一切情識入唵摩羅佛言諸佛如來常以一覺而轉諸識入唵摩羅何以故一切衆生本覺常以一覺覺諸衆生令彼衆生皆得本覺覺諸情識空寂無生何以故決定本性本無有動  
無住菩薩言可一切識皆緣境起如何不動佛言一切境本空一切識本空空無緣性如何緣起

無住菩薩言一切境空如何言見佛言見即  
爲妄何以故一切萬有無生無相本不自名  
悉皆空寂一切法相亦復如是一切眾生身  
亦如是身尚不有云何有見

無住菩薩言一切境空一切身空一切識空  
覺亦應空佛言可一覺者不毀不壞決定性  
故非空非不空無空不空

無住菩薩言諸境亦然非空相非無空相佛  
言如是彼可境者性本決定決定性根無有  
處所

無住菩薩言覺亦如是無有處所佛言如是  
覺無處故清淨清淨無覺物無處所故清淨  
清淨無色

無住菩薩言心眼識亦復如是不可思議佛  
言心眼識亦復如是不可思議何以故色無

卷之二

十一

處所清淨無名不入於內眼無處所清淨無  
見不出於外心無處所清淨無止無有起處  
識無處所清淨無動無有緣別性皆空寂性  
無有覺覺則爲覺善男子覺知無覺諸識則  
入何以故金剛智地解脫道斷斷已入無住  
地無有出入心處無在決定性地其地清淨  
如淨瑠璃性常平等如彼大地覺妙觀察如  
慧日光利成得本如大法雨入是智者是入  
佛智地入智地者諸識不生  
無住菩薩言如來所說一覺聖力四弘智地  
即一切眾生本根覺利何以故一切眾生即  
此身中本來滿足佛言如是何以故一切眾  
生本來無漏諸善利本今有欲刺爲未降伏  
無住菩薩言若有眾生未得本利猶有採集  
云何降伏難伏佛言若集若獨行分別及以

卷九

十一

染迴神住空窟降伏難調伏解脫魔所縛超  
然露地坐識陰般涅槃

無住菩薩言心得涅槃獨一無伴常住涅槃應  
當解脫佛言常住涅槃是涅槃縛何以故涅  
槃本覺利覺利本涅槃涅槃覺分即本覺分  
覺性不異涅槃無異覺本無生涅槃無生覺  
本無滅涅槃無滅涅槃本故無得涅槃涅槃  
無得云何有住善男子覺者不住涅槃何以  
故覺本無生離眾生垢覺本無寂離涅槃動  
住如是地心無所住無有出入入唵摩羅識  
無住菩薩言唵摩羅識是有入處處有所得  
是得法也佛言不也何以故譬如迷子手執  
金錢而不知有遊行十方經五十年貧窮困  
苦專事求索而以養身而不充足其父見子  
有如是事而謂子言汝執金錢何不取用隨

意所須皆得充足其子醒已而得金錢心大  
歡喜而謂得錢其夕謂言迷子汝勿欣懌所  
得金錢是汝本物汝非有得云何可喜善男  
子唵摩羅者亦復如是本無出相今即非入  
昔迷故非無今覺故非入

無住菩薩言彼父知其子迷云何經五十年  
十方遊歷貧窮困苦方始告言佛言經五十  
年者一念心動十方遊歷遠行遍計

無住菩薩言云何一念心動佛言一念心動  
五陰俱生五陰生中具五十惡

無住菩薩言遠行遍計遊歷十方一念心生  
具五十惡云何令彼眾生無生一念佛言令  
彼眾生安坐心神住金剛地靜念無起心常  
安泰即無生一念

無住菩薩言不可思議覺念不生其心安泰

難九

十二

即本覺利利無有動常在不無無有不無不無不覺覺知無覺本利本覺覺者清淨無染不變不易決定性故不可思議佛言如是無住菩薩聞是語已得未曾有而說偈言

尊者大覺尊 說生無念法 無念無生心

心常生不滅 一覺本覺利 利諸本覺者

如彼得金錢 所得即非得

爾時大衆聞說是語皆得本覺利般若波羅蜜

### 入實際品第五

於是如來作如是言諸菩薩等本利深入可度衆生若後非時應如說法時利不俱順不順說非同非異相應如說引諸情智流入薩婆若海無令可衆挹彼虛風悉令彼庶一味神乳世間非世間住非住處五空出入無有

取捨何以故諸法空相性非有無非無不無不無不有無決定性不住有無非彼有無凡聖之智而能惻隱諸菩薩等若知是利即得菩提

爾時衆中有一菩薩名曰大力九即從座起前

白佛言尊者如佛所說五空出入十三無有取捨

云何五空而不取捨佛言菩薩五空者三有

是空六道影是空法相是空名相是空心識

義是空菩薩如是等空空不住空空無空相

無相之法有何取捨入無取地則入三空

大力菩薩言云何三空佛言三空者空相亦

空空空亦空所空亦空如是等空不住三相

不無真實文言道斷不可思議

大力菩薩言不無真實是相應有佛言無不

住無有不住有不有之法不即住無不無之

相不即住有非以有無而詮得理菩薩無名義相不可思議何以故無名之名不無於名無義之義不無於義

大力菩薩言如是名義真實如相如來如相如不住如如無如相相無如故非不如來衆生心相相亦如來衆生之心應無別境佛言如是衆生之心實無別境何以故心本淨故理無穢故以染塵故名爲三界三界之心名爲別境是境虛妄從心化生心若無妄即無別境

大力菩薩言心若在淨諸境不生此心淨時應無三界佛言如是菩薩心不生境不生心何以故所見諸境唯所見心心不幻化則無所見菩薩內無衆生三性空寂則無已衆亦無他衆乃至二入亦不生心得如是利則

無三界

大力菩薩言云何二入不生於心心本不生云何有入佛言二入者一謂理入二謂行入理入者深信衆生不異真性不一不共但以客塵之所翳障不去不來凝住覺觀諦觀佛性不有不無無已無他凡聖不二金剛心地堅住不移寂靜無爲無有分別是名理入行入者心不傾倚影無流易於所有處靜念無求風鼓不動猶如大地捐離心我救度衆生無生無相不取不捨菩薩心無出入無出入不入故故名爲入菩薩如是入法法相不空不空之法法不虛棄何以故不無之法具足功德非心非影法爾清淨

大力菩薩言云何非心非影法爾清淨佛言空如之法非心識法非心使所有法非空相

法非色相法非心有為不相應法非心無為是相應法非所現影非所顯示非自性非差別非名非相非義何以故義無如故無如之法亦無無如無有無如非無如有何以故根理之法非理非根離諸諍論不見其相菩薩如是淨法非生之所生生非滅之所滅滅

大力菩薩言不可思議如是法相不合成不獨成不羈不絆不聚不散不生不滅亦無來相及以去相不可思議佛言如是不可思議不思議心心亦如是何以故如不異心心本

難九

十五

如故衆生佛性不一不異衆生之性本無生滅生滅之性性本涅槃性相本如如無動故一切法相從緣無起起相性如如無所動因緣性相相本空無緣緣空空無有緣起一切緣法惑心妄見現本不生緣本無故心如法

理自體空無如彼空王本無住處凡夫之心妄分別見如如之相本不有無有無之相見唯心識菩薩如是心法不無自體自體不有不有不無菩薩無不無相非言說地何以故真如之法虛曠無相非二乘所及虛空境界內外不測六行之士乃能知之

大力菩薩言云何六行願爲說之佛言一者十信行二者十住行三者十行行四者十迴向行五者十地行六者等覺行如是行者乃能知之

大力菩薩言實際覺利無有出入何等法心得入實際佛言實際之法法無有際無際之心則入實際

大力菩薩言無際心智其智無崖無崖之心心得自在自在之智得入實際如彼凡夫輒

心衆生其心多喘以何法御令得堅心得入  
實際佛言菩薩彼心喘者以內外使隨使流  
注滴瀝成海大風鼓浪大龍驚駭驚駭之心  
故令多喘菩薩令彼衆生存三守一入如來  
禪以禪定故心則無喘

大力菩薩言何謂存三守一入如來禪佛言  
存三者存三解脫守一者守一心如入如來  
禪者理觀心如如是地即入實際

大力菩薩言三解脫法是何等事理觀三昧  
從何法入佛言三解脫者虛空解脫金剛解  
脫般若解脫難九理觀心者心如理淨無可十六不心  
大力菩薩言云何存用云何觀之佛言心事  
不二名存用內行外行出入不二不住一  
相心無得失一不一地淨心流入是名觀之  
菩薩如是之人不住二相雖不出家不住在

家故雖無法服不具持波羅提木叉戒不入  
布薩能以自心無爲自恣而獲聖果不住二  
乘入菩薩道後當滿地成佛菩提

大力菩薩言不可思議如是之人非出家非  
不出家何以故入涅槃宅著如來衣坐菩提  
座如是之人乃至沙門宜應敬養佛言如是  
何以故入涅槃宅心越三界著如來衣入法  
空處坐菩提座登正覺一地如是之人心超  
二乘何況沙門而不敬養

大力菩薩言如彼一地及與空海二乘之人  
爲不見也佛言如是彼二乘人味著三昧得  
三昧身於彼空海一地如得酒病昏醉不醒  
乃至數劫猶不得覺酒消始悟方修是行後  
得佛身如彼人者從捨闍提即入六行於行  
地所一念淨心決定明白金剛智力阿鞞跋

難九

十七

致度脫衆生慈悲無盡

大力菩薩言如是之人應不持戒於彼沙門  
應不敬仰佛言爲說戒者不善慢故海波浪  
故如彼心地八識海澄九識流淨風不能動  
波浪不起戒性等空持者迷倒如彼之人七  
六不生諸集滅定不離三佛而發菩提三無  
相中順心玄入深敬三寶不失威儀於彼沙  
門不無恭敬菩薩彼仁者不住世間動不動  
法入三空聚滅三有心

大力菩薩言彼仁者果滿於足德佛如來藏  
佛形像佛如是佛所而發菩提心入三聚戒  
不住其相滅三有心不居寂地不捨可衆入  
不調地不可思議爾時舍利弗從座而起前  
說偈言

具足般若海 不住涅槃城 如彼妙蓮華

高原非所出 諸佛無量劫 不捨諸煩惱  
度世然後得 如泥華所出 如彼六行地  
菩薩之所修 如彼三空聚 菩提之真道  
我今住不住 如佛之所說 來所還復來  
具足然後出 復令諸衆生 如我一無二  
前來後來者 悉令登正覺  
爾時佛告舍利弗言不可思議汝當於後成  
菩提道無量衆生超生死海爾時大衆皆悟  
菩提諸小衆等入五空海

金剛三昧經卷上

音釋

恢 枯回切 挹 於汲切 羈 居宜切 絆 博漫切  
喘 昌充切 疾息也 駭 下楷切 騖 下楷切

金剛三昧經卷下

難十

出北涼錄失譯師名

眞性空品第六

爾時舍利弗而白佛言尊者修菩薩道無有名相三戒無儀云何攝受為衆生說願佛慈悲為我宣說佛言善男子汝今諦聽為汝宣說善男子善不善法從心化生一切境界意念分別制之一處衆緣斷滅何以故善男子一本不起三用無施住於如理六道門杜四緣如順三戒具足

舍利弗言云何四緣如順三戒具足佛言四緣者一謂作擇滅力取緣攝律儀戒二謂本利淨根力所集起緣攝善法戒三謂本慧大悲力緣攝衆生戒四謂一覺通智力緣順於如住是謂四緣善男子如是四大緣力不住

事相不無功用離於一處則不可求善男子如是一事通攝六行是佛菩提薩婆若海

舍利弗言不住事相不無功用是法眞空常樂我淨超於二我大般涅槃其心不繫是大力觀是觀覺中應具三十七道品法佛言如是具三十七道品法何以故四念處四正勤四如意足五根五力七覺分八正道等多名一義不一不異以名數故但名但字法不可得不得之法一義無文無文相義眞實空性空性之義如實如如如之理具一切法善男子住如理者過三苦海

舍利弗言一切萬法皆悉言文言之相即非為義如實之義不可言說今者如來云何說法佛言我說法者以汝衆生在生說故說不可說是故說之我所說者義語非文衆生

說者文語非義非義語者皆悉空無空無之言無言於義不言義者皆是妄語如義語者實空不空空實不實離於二相中間不中不中之法離於三相不見處所如如說如無無有無有於無如無有無有無於有有無不在說不在故不在於如如不有如不無如說舍利弗言一切衆生從一闡提闡提之心住何等位得至如來如來實相佛言從闡提心乃至如來如來實相住五等位一者信位信此身中真如種子爲妄所翳捨離妄心淨心清白知諸境界意言分別二者思位思者觀諸境界唯是意言意言分別隨意顯現所見境界非我本識知此本識非法非義非所取非能取三者修位修者常起能起起修同時先以智導排諸障難出離蓋纏四者行位行

者離諸行地心無取捨極淨根利不動心如決定實性大般涅槃唯性空大五者捨位捨者不住性空正智流易大悲如相相不住如三藐三菩提虛心不證心無邊際不見處所是至如來善男子五位一覺從本利入若化衆生從其本處舍利弗言云何從其本處佛言本來無本處於無處空際入實發菩提心而滿成聖道何以故善男子如手執彼空不得非不得舍利弗言如尊所說在事之先取以本利是念寂滅寂滅是如<sup>十</sup>總持諸德該羅萬法圓融不二不可思議當知是法即是摩訶般若波羅蜜是大神呪是大明呪是無上呪是無等等呪佛言如是如是真如空性性空智火燒滅諸結平等平等覺三地妙覺三身於九

識中皎然明淨無有諸影善男子是法非因  
非緣智自用故非動非靜用性空故非有非  
無空相空故善男子若化衆生令被衆生觀  
入是義入是義者是見如來

舍利弗言如來義觀不住諸流應離四禪而  
超有頂佛言如何以故一切法名數四禪  
亦如是若見如來者如來心自在常在滅盡  
處不出亦不入內外平等故善男子如彼諸  
禪觀皆爲想空定是如非復彼何以故以如  
觀如實不見觀如相諸相已寂滅寂滅即如  
義如彼想禪定是動非是禪何以故禪性離  
諸動非染非所染非法非影離諸分別本義  
義故善男子如是觀定乃名爲禪

舍利弗言不可思議如來常以如實而化衆  
生如是實義多文廣義利根衆生乃可修之

鈍根衆生難以措意云何方便令彼鈍根得  
入是諦佛言令彼鈍根受持一四句偈即入  
實諦一切佛法攝在一四偈中舍利弗言云  
何一四句偈願爲說之於是尊者而說偈言  
因緣所生義 是義滅非生 滅諸生滅義  
是義生非滅

爾時大衆聞說是偈僉大歡喜皆得滅生滅  
生般若性空智海

如來藏品第七

爾時梵行長者從本際起而白佛言尊者生  
義不滅滅義不生如是如義即佛菩提菩提  
之性則無分別無分別智分別無窮無窮之  
相唯分別滅如是義相不可思議不思議中  
乃無分別尊者一切法數無量無邊無邊法  
相一實義性唯住一性其事云何佛言長者

不可思議我說諸法爲迷者故方便導故一切法相一實義智何以故譬如一市開四大門是四門中皆歸一市如彼衆庶隨意所入種種法味亦復如是

梵行長者言法若如是我住一味應攝一切諸味佛言如是如是何以故一味實義如一大海一切衆流無有不入長者一切法味猶彼衆流名數雖殊其水不異若住大海則括衆流住於一味則攝諸味

梵行長者言諸法一味云何三乘道其智有異佛言長者譬如江河淮海大小異故深淺殊故名文別故水在江中名爲江水水在淮中名爲淮水水在河中名爲河水俱在海中唯名海水法亦如是俱在真如唯名佛道長者住一佛道即達三行

雜十

五

梵行長者言云何三行佛言一隨事取行二隨識取行三隨如取行長者如是三行總攝衆門一切法門無不此入入是行者不生空相如是入者可謂入如來藏入如來藏者入不入故

梵行長者言不可思議入如來藏如苗成實無有入處本根利力利成得本得本實際其智幾何佛言其智無窮略而言之其智有四何者爲四一者定智所謂隨如二者不定智所謂方便摧破三者涅槃智所謂慧除電覺四者究竟智所謂入實具足道長者如是四大事用過去諸佛所說是大橋梁是大津濟若化衆生應用是智長者用是大用復有三大事一者於三三昧內外不相奪二者於大義科隨道擇滅三者於如慧如定以悲俱利

如是三事成就菩提不行是事則不能流入彼四智海為諸大魔所得其便長者汝等大衆乃至成佛常常修習勿令暫失

梵行長者言云何三三昧佛言三三昧者所謂空三昧無相三昧無作三昧如是三昧梵行長者言云何於大義科佛言大謂四大義謂陰界入等科謂本識是為於大義科梵行長者言不可思議如是智事自利利人過三界地不住涅槃入菩薩道如是法相是生滅法以分別故若離分別法應不滅爾時如來欲宣此義而說偈言

法從分別生 還從分別滅 滅諸分別法 是法非生滅

爾時梵行長者聞說是偈心大欣懌欲宣其義而說偈言

雜十

六

|                   |       |       |
|-------------------|-------|-------|
| 諸法本寂滅             | 寂滅亦無生 | 是諸生滅法 |
| 是法非無生             | 彼則不共此 | 為有斷常故 |
| 此則離於二             | 亦不在一住 | 若說法有一 |
| 是相如毛輪             | 如燄水迷倒 | 為諸虛妄故 |
| 若見於法無             | 是法同於空 | 如盲無目倒 |
| 說法如龜毛             | 我今聞佛說 | 知法非二見 |
| 亦不依中住             | 故從無住取 | 如來所說法 |
| 悉從於無住             | 我從無住處 | 是處禮如來 |
| 敬禮如來相             | 等空不動智 | 不著無處所 |
| 敬禮無住身             | 我於一切處 | 常見諸如來 |
| 惟願諸如來             | 為我說常法 |       |
| 爾時如來而作是言諸善男子汝等諦聽為 |       |       |
| 汝眾等說於常法善男子常法非常法非說 |       |       |
| 亦非字非諦非解脫非無非境界離諸妄斷 |       |       |
| 際是法非無常離諸常斷見了見識為常是 |       |       |

識常寂滅寂滅亦寂滅善男子知法寂滅者  
 不寂滅心心常寂滅得寂滅者心常真觀知  
 諸名色唯是癡心癡心分別分別諸法更無  
 異事出於名色知法如是不隨文說心心於  
 義不分別我知我假名即得寂滅若得寂滅  
 即得阿耨多羅三藐三菩提爾時長者梵行  
 聞說是語而說偈言

名相分別事 及法名為三 真如正妙智  
 及彼成於五 我今知是法 斷常之所繫  
 入於生滅道 是斷非是常 如來說空法  
 遠離於斷常 因緣無不生 不生故不滅  
 因緣執為有 如採空中華 猶如石女子  
 畢竟不可得 離諸因緣取 亦不從他滅  
 及於已義大 依如故得實 是故真如法  
 常自在如如 一切諸萬法 非如識所化

離識法即空 故從空處說 滅諸生滅法  
 而住於涅槃 大悲之所奪 涅槃滅不住  
 轉所取能取 入於如來藏  
 爾時大眾聞說是義皆得正命入於如來如  
 來藏海

總持品第八

爾時地藏菩薩從眾中起至于佛前合掌胡  
 跪而白佛言尊者我觀大眾心有疑事猶未  
 得決今者如來欲為除疑我今為眾隨疑所  
 問願佛慈悲垂哀聽許佛言菩薩摩訶薩汝  
 能如是救度眾生是大悲愍不可思議汝當  
 廣問為汝宣說地藏菩薩言一切諸法云何  
 不緣生爾時如來欲宣此義而說偈言  
 若法緣所生 離緣可無法 云何法性無  
 而緣可生法

爾時地藏菩薩言法若無生云何說法法從

心生於是尊者而說偈言

是心所生法 是法能所取 如醉眼空華

是法然非彼

爾時地藏菩薩言法若如是法則無待無待

之法法應自成於是尊者而說偈言<sup>十</sup>

法本無有無 自他亦復爾 不始亦不終

成敗則不住

爾時地藏菩薩言一切諸法相即本涅槃涅

槃及空相亦如是無是等法是法應如佛言

無如是法是法是如

地藏菩薩言不可思議如是如相非共不共

意取業取即皆空寂空寂心法俱不可取亦

應寂滅於是尊者而說偈言

一切空寂法 是法寂不空 彼心不空時

是得心不有

爾時地藏菩薩言是法非三諦色空心亦滅

是法本滅時是法應是滅於是尊者而說偈

言

法本無自性 由彼之所生 不於如是處

而有彼如是

爾時地藏菩薩言一切諸法無生無滅云何

不一於是尊者而說偈言

法住處無在 相數空故無 名說二與法

是則能所取

爾時地藏菩薩言一切諸法相不住於二岸<sup>九</sup>

亦不住中流心識亦如是云何諸境界從識

之所生若識能有所生是識亦從生云何無生

識能生有所生於是尊者而說偈言

所生能生二 是二能所緣 俱本各自無

取有空華幻 識生於未時 境不是時生  
於境生未時 是時識亦滅 彼即本俱無  
亦不有無有 無生識亦無 云何境從有  
爾時地藏菩薩言法相如是內外俱空境智  
二衆本來寂滅如來所說實相真空如是之  
法即非集也佛言如是如實之法無色無住  
非所集非能集非義非文一本科法深功德  
聚  
地藏菩薩言不可思議不思議聚七五不生  
八六寂滅九相空無有空無有無空無有如  
尊者所說法義皆空入空無行不失諸業無  
我我所能所身見內外結使悉皆寂靜故諸  
願亦息如是理觀慧定真如尊者常說寔如  
空法即良藥也佛言如是何以故法性空故  
空性無生心常無生空性無滅心常無滅空

性無住心亦無住空性無爲心亦無爲空無  
出入離諸得失陰界入等皆悉亦無心如不  
著亦復如是菩薩我說諸空破諸有故  
地藏菩薩言尊者知有非實如陽燄水知實  
非無如火性生如是觀者是人智也佛言如  
是何以故是人真觀觀一寂滅相與不相等  
以空取以修空故不失見佛以見佛故不順  
三流於大乘中三解脫道一體無性以其無  
性故空空故無相無相故無作無作故無求  
無求故無願以是業故淨心以心淨故見佛  
以見佛故當生淨土菩薩於是深法三化勤  
修慧定圓成即超三界  
地藏菩薩言如來所說無生無滅即是無常  
滅是生滅生滅滅已寂滅爲常常故不斷是  
不斷法離諸三界動不動法於有爲法如避

火坑依何等法而自訶責入彼一門佛言菩薩於三大事訶責其心於三大諦而入其行地藏菩薩言云何三事而責其心云何三諦而入一行佛言三大事者一謂因二謂果三謂識如是三事從本空無非我真我云何於是而生愛染觀是三事爲繫所縛飄流苦海以如是事常自訶責三諦者一謂菩提之道是平等諦非不平等諦二謂大覺正智得諦非邪智得諦三謂慧定無異行入諦非離行入諦以是三諦而修佛道是人於是法無不得正覺得正覺智流大極慈已他俱利成佛菩提

地藏菩薩言尊者如是之法則無因緣若無緣法因則不起云何不動法得入如來爾時如來欲宣此義而說偈言

難十

十一

|       |       |       |
|-------|-------|-------|
| 一切諸法相 | 性空無不動 | 是法於是時 |
| 不於是時起 | 法無有異時 | 不於異時起 |
| 法無動不動 | 性空故寂滅 | 性空寂滅時 |
| 是法是時現 | 離相故寂住 | 寂住故不緣 |
| 是諸緣起法 | 是法緣不生 | 因緣生滅無 |
| 生滅性空寂 | 緣性能所緣 | 是緣本緣起 |
| 故法起非緣 | 緣無起亦爾 | 因緣所生法 |
| 是法是因緣 | 因緣生滅相 | 彼則無生滅 |
| 彼如真實相 | 本不於出沒 | 諸法於是時 |
| 自生於出沒 | 是故極淨本 | 本不因衆力 |
| 即於後得處 | 得得於本得 |       |

爾時地藏菩薩聞佛所說心地快然時諸衆等無有疑者知衆心已而說偈言

我知衆心疑 所以殷固問 如來大慈善  
 分別無有餘 是諸二衆等 皆悉得明了

我今於了處 普化諸衆生 如佛之大悲  
不捨於本願 故於一子地 而住於煩惱  
爾時如來而告衆言是菩薩者不可思議恒  
以大慈扶衆生苦若有衆生持是經法持是  
菩薩名即不墮於惡趣一切障難皆悉除滅  
若有衆生持此經者無餘雜念專念是經如  
法修習爾時菩薩常作化身而爲說法擁護  
是人終不暫捨令是人等速得阿耨多羅三  
藐三菩提汝等菩薩若化衆生皆令修習如  
是大乘決定了義

爾時阿難從座而起前白佛言如來所說大  
乘福聚決定斷結無生覺利不可思議如是  
之法名爲何經受持是經得幾所福願佛慈  
悲爲我宣說佛言善男子是經名者不可思  
議過去諸佛之所護念能入如來一切智海

十

十二

若有衆生持是經者則於一切經中無所希  
求是經典法總持衆法攝諸經要是諸經法  
法之繫宗是經名者名攝大乘經又名金剛  
三昧又名無量義宗若有人受持是經典者  
即名受持百千諸佛如是功德譬如虛空無  
有邊際不可思議我所囑累唯是經典  
阿難言云何心行云何人者受持是經佛言  
善男子受持是經者是人心無得失常修梵  
行若於戲論常樂靜心入於聚落心常在定  
若處居家不著三有是人現世有五種福一  
者衆所尊敬二者身不橫夭三者辯答邪論  
四者樂度衆生五者能入聖道如是人者受  
持是經  
阿難言如彼人者度諸衆生得受供養不佛  
言如是人者能爲衆生作大福田常行大智

權實俱演是四依僧於諸供養乃至頭目髓腦亦皆得受何況衣食而不得受善男子如是人者是汝知識是汝橋梁何況凡夫而不供養

阿難言於彼人所受持是經供養是人得幾雜十所福佛言若復有人持以滿城金銀而以布施不如於是人所受持是經一四句偈不可思議善男子令諸衆生持是經者心常在定不失本心若失本心即當懺悔懺悔之法是爲清涼

阿難言懺悔先罪不入於過去也佛言如是猶如暗室若遇明燈暗即滅矣善男子無說悔先所有諸罪而以爲說入於過去

阿難言云何名爲懺悔佛言依此經教入真實觀一入觀時諸罪悉滅離諸惡趣當生淨

土速成阿耨多羅三藐三菩提佛說是經已爾時阿難及諸菩薩四部之衆皆大歡喜心得決定頂禮佛足歡喜奉行

金剛三昧經卷下

音釋

懺羊益切  
悅也